



Inatsisartunut ilaasortaq
(Stine Egede)
Inuit Ataqatigiit

**Meeqqat pinngitsaaliissummik arsaarinnissutigisarnerannut tunngatillugu § 37
naapertorlugu apeqqummut nr. 192-imut akissut**

17-11-2020
Suliap normua. 2020 - 23536
All. id. 15331262

Asasara Stine Egede

Postboks 260
3900 Nuuk
Oqarasuaat (+299) 34 50 00
Naqitanik nassitsigasuaat
(+299) 34 66 66
E-mail: iian@nanoq.gl
www.naalakkersuisut.gl

Apeqqtinnut qujanaq. Apeqqutit tullinnguuttuni uteqqinneqarput, akissutinik tulleqarlutik. Apeqqutigineqartut 1 aamma 2 ataatsimut akissuteqarfigineqarput.

Meeqqat angajoqqaat akornanni akerleriissutaallutik qitiutinneqaleraangata tamatigit aliatsannartarpoq, angajoqqaatut oqartussaassuseqarneq, najugaqarfik najugaqatigiinnissarluunniit pineqaraangata apeqquataanatik. Pisuni tamani angajoqqaat akisussaassuseqarnerannut inatsimmi ilaasuni meeqqap pitsaanerpaamik pineqarnissaa aamma meeqqap atugarissaarnissaminut pisinnaatitaaffeqarnera illersorneqarnissaalu salliutinneqartartussaapput. Meeqqat atugarisaanut aalajangiinernik aalajangiisoqartillugu angajoqqaat akisussaassuseqarnerannut inatsimmi allannguutit massakkut Inatsisartuni suliarineqartut tamannarpiaq angajoqqaanut aamma eqqartuussivimmu Naalagaaffiullu Sinniisoqarfianut tunngatillugu erseqqissarneqarput.

**1. Qallunaat oqartussaasuisa kalaallit meerartaannik arsaarinnittarnerat
Naalakkersuisut qisuariaateqarnatik akueriinnalersaarpaat?**

**2. Qallunaat oqartussaasuisa kalaallit angajoqqaat akuutillugit angajoqqaat
najorneqartut, angajoqqaatullu oqartussaarnermik sulianik ingerlatsinerat
Naalakkersuisut iluarisimaarpaat?**

Naalakkersuisut suliart inunnut tunngasut tunngaviutinneqartut pissutigalugit suliarineq ajorpaat. Apeqqutigineqartut ataatsimut qanoq oqaaseqatigiiliarineqarsimagaluarpataluunniit suliamut pineqartumut tunngavilersuummi innersuussutigineqartut ima qanitsigisut nalilerneqarput suliamut oqaaseqaateqarnissaannut tunngavissaqarnanga isumaqarlunga.

Tunngaviummik Inatsimmi § 3 naapertorlugu pissaanerup pingasunut avinneqarnera pillugu tunngavigineqartuni innuttaasut akornanni akerleriissutivinnut atatillugu eqqartuussiviit aalajangiineranut Naalakkersuisut aamma akuliussinnaatitaangillat. Tamanna aamma suliani eqqartuussutinut aalajangiiffigineqareersunut aamma sulianut ingerlaartunut atuuppoq.

3. Angajoqqaap aappaa Danmarkimi najugaqartillugu aappaalu Kalaallit Nunaanni najugaqartillugu angajoqqaatut oqartussaaneq pillugu suliani periutsit ersarissarniarlugit Naalakkersuisut qallunaat oqartussaasuinik oqaloqatiginnissamik aallartitsinissamik suliaqalersaarpat?

Ilaqutariinnut inatsiseqartitsineq suliassaqarfiuvoq suli tiguneqarsimangitsoq. Taamaalilluni danskit inatsisaat taakkuupput Kalaallit Nunaannut peqqussut aqqutigalugu suliassaqarfimmumut malittarisassiorfiusut. Naalakkersuisut soorunami soqutigisarilluinnarpaat piginnaatitsissutit ersarissumik agguataartariaqartut, malittarisassallu illuatungeriinnut takujuminartuusariaqartut. Taamaammat Kalaallit Nunaannut ilaqutariinnut inatsiseqartitsinerit nutarteriffiginissaannut naleqqussarnissaannullu ministeriaqarfimmumut akisussaasumut, Social- og Indenrigsministeriaqarfimmumut, Naalakkersuisut oqaloqateqarnertik ingerlattuarpaat.

Tamanna kingullermik meeravissiartaarnermut inatsit aamma angajoqqaat akisussaassuseqarnerannut inatsit pillugit peqqussummut tunngatillugu aalajangiiffigisassatut siunnersuummi taaneqartumi atortussanngortinneqarpoq (UKA2020-mi immikkoortoq 185).

Social- og Indenrigsministeriaqarfik Folketingip Kalaallit Nunaannut Ataatsimiititaliaanit apeqqutigineqartut arlallit akissuteqarfiginiarlugit massakkut aallartissimammat Naalakkersuisut ilisimavaat. Apeqqutit suliaq pineqartoq siuliani taaneqareersoq tunngavigalugu apeqqutigineqarsimapput. Apeqqutigineqartut ilaat inaarutaasumik akissuteqarfigineqarsimapput, ilaallu akissuteqarfigineqarallarsimallutik.

Apeqqutigineqartut kingulliit ilaanni meeqqanut sulianut tunngatillugu kalaallit danskillu oqartussaaffiisa akornanni piginnaatitsissutit agguataartarnerannut ministerip misissuerusussinnaanera pineqarpoq, matumani angajoqqaap aappaa Kalaallit Nunaanni aappaalu Danmarkimi najugaqarsimatillugit, soorlu suleqatigiissitaq suligasuartussa aqqutigalugu. Naalakkersuisut ministerip apeqqummut isummernissaa utaqqivaat, piginnaatitsissutinullu apeqqutinngortut il.il. sukumiinerusumik qulaajaaffiginissaat siunertaralugu ministerimik kinguneratigut oqaloqateqarnissaq naatsorsuutigalugu.

4. Naalakkersuisut sammisaq pillugu allanik paasissutissiissutissaqarpat?

Naamik

Inussiarnersumik inuulluaqqusillunga


Martha Abelsen